

La poesia, in versi sciolti, è stata composta negli anni Ottanta del Novecento.

Istraccos
de su patire
sezis partidos
cuntentos
e non sezis torrados
a-i custas tancas
bardadas.

Bos han' saludadu
sas arvures
birdes
e bos han' miradu
sas nues
a bolu
e-i sas pedras
pasadas
in sas chijuras.

Hazis lassadu custu logu
solianu
sas peraulas sinzeras
sos beraniles
e-i sas roccas.
Non bos han' frimmadu
sos passos
lèbios
sas luzanas nieddas.

Non sezis torrados
o amigos
a cantare sos àlidos
de su coro
a sas dies indeoradas
a sos fiores primadios
messajeddos
de tristura
in su tirighinu lestru
de sa vida.

Non sezis torrados
o frades
e ... bos isetto
a s'impuddile
cando sas laras

rujas
de s'ispera
prommittin' oras
longas
e chena 'entos.

Non sezis torrados
o fijos
e... bos isetto
a s'intrinada
cando sa cara
bianca
in s'ultimu 'asu
abbrazzat segura
sos caminos
lezeros
de s'anima.